

MFA Noord ta e prome edificio di energia sostenibel na Aruba

ORANJESTAD - E edificio Multi-Funcional di Noord (MFA) ta bay ta e prome edificio na Aruba cu ta totalmente sostenibel. E sistema di plachinan solar ta genera suficiente energia pa abastecer e necesidadnan di edificio na Noord. E sistema por te hasta produci suficiente coriente cu e por suministra e 'grid' di Elmar cu e exceso.

Den presencia di miembronan di team ehecutivo di MFA manera Anky Vrolijk y Harm van Sjeip como tambe gerencia di MFA Noord, Richard Tromp y Chris Figaroa, Prome Minister Mike Eman a subi



riba e dak di e edificio grandi y moderno ubica na crusada principal di Noord diabierna ultimo. Aki el a combersa cu e trahadonan cu ya caba a cuminsa cu e trabou di instalacion di e plachinan solar y nan conexion pa suministra coriente na e edificio. Compania local Retraco ta encarga cu instalacion di e sistema di plachi solar di MFA Noord. Director di Retraco, Sr. John Reyes tabata presente supervisando e trabounan. El a indica cu tur cos ta canando segun plan y den e proximo 10 dia, ta finalisa e proyecto. Jamil Werleman, di oficina di MFA cu a coordina e proyecto di plachinan solar, a confirma loke Sr. Reyes a expresa y a bisa cu e comunicacion entre tur partido envolvi, incluyendo WEB y Elmar a haci cu e trabounan ta bayendo hopi bon.

Den su vision pa haci Aruba sostenibel, Minister President ta buscando pa mas tanto edificio di Gobierno, incluyendo scolnan, genera nan propio coriente y contribui na e 'grid' di Aruba. Pronto ta bay inicio proyecto publico caminda 20 edificio di scol rond di Aruba ta haya plachinan solar riba nan dak pa asina nan genera nan propio coriente, y contribui tambe na e produccion na nivel nacional. E trabounan aki ta hiba e prome MFA na Aruba un



poco mas cerca di su apertura y nos pais mas dilanti den su meta pa ta 100% sostenibel.

Pa Aruba crea un suministro di energia sostenibel ta algo hopi importante pa economia y bienestar general riba termino largo. Costo di combustibel pa produci coriente ta algo necesario y ta pronostica cu na cierto momento e costo nan ta bay subi incontrollabel riba mercado mundial. Ariba dje, solo y biento ta recursonan natural cu Aruba tin mas cu suficiente y no ta costa nada pa haci uzo di nan. Si tur cos cana bon, edificio di MFA Noord ta habri den luna di juli. □